

Date – 27/06/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

- 1. Electoral roll Special Intensive Revision (SIR) kal mekah Mizoramah Polling Station thar 52 siam a ni dawn.
- 2. Aizawl Sahuana keipui (Bengal tiger) hliam chu hlawhtling takin an enkawl.
- 3. Mizoramah kumin 2026 chhungin ruihhlo vangin mi 26 an thi tawh a, zu kaihhnawih vangin mi 18 an thi tawh bawk.
- 4. Prime Minister Narendra Modi chuan ni 3 chhung cham tura Seychelles tlawh turin Victoria a thleng.

<><><>

POLLING STATIONS

Electoral roll Special Intensive Revision (SIR) kal mekah Mizoramah Polling Station thar 52 siam a ni dawn.

Election Commission of India (ECI)-in SIR kalpui dan tur a duan lawk dan chuan May ni 30 leh June ni 28 inkar chhung hian Booth Level Officer (BLO) te’n an bial chhunga in tin tlawhin enumeration form sem leh lakkhawm hna an thawk ang a. June ni 28 hi polling station siamrem ni atana hman turin a ruahman bawk a. Tun dinhmuna hriat theih chinah Polling Station thar 52 siam belh tura ruahman a nih avangin Mizoramah polling station 1,301 awm thin kha polling station 1,353 a awm tawh dawn a. ECI duhdan angin polling station hi vote neite awmna atanga kilometre 2 aia hla ke a kal ngai lo tura dah tur a ni a. Polling station tina vote awm zat hi 1,200 aia tam lo tura ruahman a ni ta bawk.

Tun dinhmunah polling station siam thar turte hi ECI chuan a rawn pawmpui tawh na a, naktukah hian online a kimchang zawka dah tura duan fel hman tum a nih thu Chief Electoral Officer (CEO) pisa atanga thudawn chuan a sawi a ni.

Puan tawh angin electoral roll Special Intensive Revision (SIR) kal mekah Mizoramah enumeration form digitise hna zawh fel a ni ta a SIR thawh thumna a state zo hmasa ber a ni. Mizoram chhunga Booth Level Officer (BLO) 1,301-te chuan May ni 30 atang khan Special Intensive Revision atana Election Commission of India (ECI) thupek angin vote neite inziahluna tur lehkha sem chhuah, laklet leh digitise hna hi ngawrh takin an thawk a. June ni 28 a zawhfel tura ECI hun biktuk hma ni 3, Ningani tlai khan digitisation hi zawhfel vek a ni a, SIR thawh thumna kalpuitu state 16 leh UT 3-te zingah Mizoram hian digitisation hi a zo hmasa ber a ni.

He tih lai hian enumeration form sem chhuah tawh lak kir theih loh hi 48,434 a awm a. An zinga mi 21,194 te chu electoral roll a chuang si thi tawhte an ni a. Hmun danga insawn nghet tawh mi 14,179 an awm a. Hmuh zawh loh hi mi 8,571 an awm a, inziaklut tawh sa mi 2,161 an awm bawk. Mi 329 chu sakhaw rinna vanga e. roll-a inziak lut duh lo an awm bawk a ni.

<><><>

ELECTROCUTION

Tukin dar 9 leh minute 20 khan Hunthar Veng, Aizawl-ah Zoland Gas Agency truck chu electric-in a man a, truck-a chuang Freddy Lalruatfela, kum 22 mi in nunna a chan.

Akashvani Aizawl News-in Maubawk Branch YMA Committee member Pu Jacob Chawngthu hnen atanga thu a dawn danin, tukin khan Freddy Lalruatfela hian Hunthar Veng, Aizawl-ah Zoland Gas Agency, Haulawng ta gas phur truck-ah Gas bur ruak a remthat fel hnuah truck body tailboard khar tura a chawi chuan electric hrui a tawk palh a, electric chuan Freddy Lalruatfela leh a chuanna truck chu manin, Freddy hian a hmunah nunna a chan zui nghal a, truck ke hnung pahnih a kang bawk a ni. Freddy Lalremruata hi vawiin khan Aizawl Civil Hospital-ah post-mortem niin, naktuk dar 12-ah a lawina kohhran, Maubawk Sikul Veng Kohhran Hall-ah vuiliam a ni ang.

<><><>

TIGER TREATMENT

Mizoram tana mellung pawimawh takah, Aizawl Sahuana keipui (Bengal tiger) hliam chu Forest Department, Wildlife Institute of India leh State Veterinary Department atanga mithiam thawk hovin nimpiniah Ningani khan hlawhtling takin an enkawl.

Akashvani Aizawl News zawhna chhangin, Aizawl Zoological Park Director Pi Margaret Lalhmachhuani chuan June ni 15 khan sahuana sakei enkawltu, animal feeder chuan Bengal tiger nu pakhat chu dan pangngai aia chaw a ei tlem avangin harsatna a neih a rin thu a sawi a, range officer leh biologist nen ngun taka sakei taksa hi an enfiah hnuah a mei chung zawnah cheng 10 thir tiat vel hliam an hmu a, sakei hi a kawlh em avangin a hliam en chiang tur hian Mizoram Vety dept. atanga mithiamte leh sahan Veterinary Field Assistant (VFA) te an pun a, a hliam chu a lung tih an hmu a. A hliam hi eng anga thuk nge tih hre turin Selesih vety college atangin a kah mutna an hawh a, June ni 18 khan kah mut an tum a, hetihlai hian an damdawi neih chu a chak tawk loh avangin an kap mu zo lova, muhil chiah lo

mutchhuak deuha a awm laiin, a hliama lung awm te chu tihfai sakin, damdawi in an kap a, a chaw ei turah damdawi an telh bawk a ni.

Doctor te chuan kar 1 chhunga an lo enkawl tawhna chuan a hliam chu a lo tidam huai hman tawh an ti a, hetihlai hian a lo inhaina lamah a ke tin pakhat a ti bung a, chu chuan hnai a lo la a. A theih ang angin an dressing a, long acting antibiotic chak chi in an chiu bawk a ni.

Pi Margaret-i chuan Mizorama ran damdawi neih te a chak tawk loh avang leh ramsa enkawl thiam an awm mai loh avangin, sakei hliam chu eng ang taka thuk nge a nih tih hre turin Wildlife Institute of India puihna an dil a, tun thla ni 24 khan Wildlife Institute of India chuan Mizoramah wildlife doctor pahnih- Dr. Lallianpuii Kawlani (Lalani), Scientist D leh Dr. Sanath Krishna Muliya, Scientist C anrawn tir a, an pahnih kaihhraina hnuaiah nimpiniah Ningani zing khan sakei chu kap muhlin, State Veterinary Department leh Forest Department atangin Dr. Jonathan, Dr. Lalchhanhima leh Dr. Joan RC Lalremruati te bakah Aizawl Zoological Park Director Pi Margaret Lalramchhani, DFO (Extension) Pu Lalruatfela, Range Officer Pu Zohmingsanga leh sahuana thawkte nen minute 45 chhungin fimkhur leh uluk takin enkawl ngai awm ang ang te hlawhtling takin an ti fel a. Tun dinhmunah sakei hian hma a sawn a, a hmaa a thinchhiat ang em em in a thinchhe tawh lo nia an hriat thu a sawi a, sakei hliam an enkawl chungchanga theihtawpa an puihnaah State Vety department Director chungah an lawm takzet tih a sawi bawk a ni.

Mizorama sahan awmchhun, Aizawl Zoological Park-ah hian ramsa 315 awm mekin, Bengal Tiger pathum-a nu pahnih leh a pa pakhat a awm a. Tuna sakei nu hliam an enkawl hi kum 9 a upa niin, Nandankanan Zoological Park, Odisha atangin kum 2023 khan Mizoramah lakluh a ni.

<><><>

HEALTH MINISTER

Health Minister Pi Lalrinpuii chuan vawiin khan Kolkata a Mizoram Universal Health Care Scheme (MUHCS) Empanelled Hospital, Mizo damlo refer tamna - Natralaya RN Tagore Hospital leh Manipal Hospital, EM bypass Road ami te chu a tlawh.

RN Tagore Hospital hi lung lam leh kal thlakna lama damdawiin tawnhriat nei tha tak an niin, Civil Hospital, Aizawl a kal thlakna kalpuina tura rawn puitu damdawiin an ni a. Tunah hian Civil Hospital Doctor leh thawktu dangten training thawhkhatna an zo tawh a, training thawhnhnihna tan leh tum mek a ni a. Health Minister chuan damlo refer te lo enkawl mai bakah Tagore Hospital leh Mizoram damdawiin te chuan Mizoram Sawrkar damdawiin tihchangtlunna tura hmachhawp hrang hrangah thawhhona tam zawk neih a duh thu a sawi a. Damdawi-in a awm mek Mizo damlote pawh harsatna an neih leh neih loh zawtin, a kan nghal bawk a ni. Damlo boral palh an awm a, Death Certificate pek chhuah muang deuh hlek thin pawh a rang thei anga pe chhuak turin Tagore damdawi-in thuneitute chu a ngen nghal a ni.

Hemi hnu hian Health Minister hian Manipal Hospital, EM Bypass Road, Kolkata a tlawh leh a. He damdawi-in hi cancer lamah super speciality hospital niin, khawh

thar tha ber ber te nena thum an nih avangin Cancer enkawl na kawngah chuan an rintlak thu an lo hrilh a. ICU leh Radiation wing te a tlawh nghal bakah damlo inenkawl mekte pawh kan nghalin, harsatna an neih leh neih loh te a zawt nghal bawh. Manipal Hospital hotute pawhin an enkawl damdawi-in hrang hranga damlo an enkawl dante, super speciality branch hrang hrang an neihte an lo hrilhfiah a, damlote chu theihtawp chhuaha an lo enkawl thin thu sawiin, theihtawp chhuah chhunzawm zel an tum thu an sawi. Minister chuan Mizoram chhunga Nursing College hrang hranga Campus recruitment neihpui atan a sawm nghal a. Anni pawhin Manipal Hospital hrang hranga thawk turin Mizo nurse tam zawk thawktu atana mamawh thu an lo sawi a ni.

Health Minister - Pi Lalrinpuii hi Director, Directorate of Health Services Dr Lily Chhakchhuak leh Joint Resident Commissioner Pu Zoremthara Ralte te'n tawiawm a ni.



DRUGS-RELATED DEATHS

Mizoramah kumin 2026 chhungin ruihhlo vangin mi 26 an thi tawh a, zu kaihhnawih vangin mi 18 an thi tawh bawh.

Excise & Narcotics Department chhinchhiah danin, kumin hian ruihhlo vangin mipa 23 leh hmeichhia 3, an vaiin mi 26 an thi tawh a. Heroin leh damdawi dang tihpawlh hman sual vanga thi te an ni. Excise & Narcotics department-in a chhinchhiah tan kum 1984 atanga tun thla June ni 24 thlengin Mizoramah ruihhlo vangin mi 2,023 an thi tawh a, chu'ng zinga mi 1,776 chu mipa niin hmeichhia 247 an awm bawh.

Hetihual hian kumin chhungin zu kaihhnawih vangin mi 18 an thi tawh a, Champhai District-ah tam berin mi 8, Lunglei leh Kolasib district-ah mi 4 ve ve leh Khawzawl district ah mi 2 an thi tawh a ni. Excise & Narcotics department chhinchhiah danin, kum 2014 atanga tun thla June ni 12 thleng khan Mizoramah zu kaihhnawih vangin mi 325 an thi tawh a, an zinga mi 279 chu mipa niin, hmeichhia 46 an awm bawh. Nikum, 2025 kha zu kaihhnawih, a bikin zu chhe in avanga thi an tam ber kum a ni a, mipa 81 leh hmeichhia 13, an vaiin mi 94 in zu an thihpui a. Kum 2024 pawh khan mipa 57 leh hmeichhia 9 thi-in zu vanga thi hi mi 66 an awm a ni.

Kumin January atanga June ni 24 inkar chhung khan Excise & Narcotics department hian heroin kg. 15 leh gram 117 an man tawh a. Methamphetamine kg. 62 leh gram 704 bakah crystal meth kg. 9 leh gram 807 an man tawh bawh a. Ganja kg 128 leh gram 544 an man bakah khuh damdawi leh thalaite'n an hman sual chi damdawi tam tham tak an man tawh bawh a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



PM IN SEYCHELLES

Prime Minister Narendra Modi chuan ni 3 chhung cham tura Seychelles tlawh turin Victoria a thleng.

Prime Minister chuan Seychelles President Dr Patrick Herminie’n airport a a lo lawm thu sawiin, Seychelles chu India ram tan a thawhpui hlu tak leh pawimawh tak anih thu a sawi a, ram pahnih te inlaichinna tihngheh lehzual te leh mipuite hamthatna tur a thawhdunna tihchak leh zual a beisei thu a sawi.

Narendra Modi hi Seychelles Independence kum 50 tlin lawmna ah khualzahawm a ni dawn a. An ram National Day lawmna ah India Prime Minister Zinga tel hmasa ber a ni.



EBOLA

Democratic Republic of Congo ramah May thla Ebola darh an puan chu mi 1200 chuangin an kai tawh.

DRC sorkara Public Health Authority in an tarlan danin Ebola hi 1,203 a tlin tawh thu leh mi 321 in an thihpui tawh thu an tarlang a, tun thlengin mi 148 enkawl dam ni tawhin, mi 419 te chu dah hran mek an la nih thu an tarlang bawk. Tun hnai-ah hri kai rinhlelh 265 awmin chung zing a mi 77 te’n an thihpui tawh bawk a ni.

World Health Organisation (WHO) Director General Tedros Adhanom chuan damlo te nena inhnaih te leh rinhlelhhte zawnychhuah hna thawh reng a nih thu sawiin, mipui te fimkhur turin a chah bawk.

